



Eilean Shòaidh.

(Daily Record)

Is ann air oirthir siar thir-móir as truaighe an suidheachadh, bho'n Pharbh gus an Rudha Murchanach agus deas air sin anns a' Mhorbhairne. Ach tha, na h-Eileanan a Muigh a' leantainn air an aon chùrsa, ged tha àireamh mhath sluagh aca fhathast. Leugh mi o chionn ghoirid na sgrìobh Mgr. Calum MacMhaoilein, fear-Pàrlamaid Innse Gall, am Paipear Ghlaschu mu Uibhist a Tuath is mu Bharraidh. Cion-cosnaidh, cion-rathaidean, faraidhean troma, cion nan goireasan a tha sluagh an là-an-diugh ag iarraidh! Gu dé a thig á so uile? Có aige a tha brath? Nach iomadh éigheach is deasbad a rinneadh mu chor na Gàidhealtachd! An diugh fhéin tha Comhairle Earalach na Gàidhealtachd, Coimision nan Croitearan, is buidheann no dhà eile, an sàs anns a' chùis, feuch an cuir iad ceart na tha ceàrr agus an cuidich iad soirbheachadh a thoirt do'n Taobh-Tuath. Gur maith a théid leotha uile!

* * * * *

Chì mi gu robh an t-Ollamh Cristean MacRath, Sàileach às gaidh, ag ràdh nach faighear gu bràth rian air cùisean na Gàidhealtachd a leasachadh gus an stéidhichear aon Bhòrd, aig am bì an dà chuid ùghdarras agus airgead a dhol an car na h-oibre. “Mar a thà,” arsa esan, “‘s ann a tha buidheann an so is buidheann an sud a' rùrach is a' cnuasachadh. Bitheadh aon bhuidheann ann, agus leig leotha a h-uile sìon a dheanamh!” Is fada o bha feadhainn againn ag ràdh rud-eigin de'n t-seòrsa, agus tha sinn toilichte gu bheil fear an àrd-inbhe mar a tha MacRath a' cur taic ri ar barail.